

# Ala xa masenyi Eburu bɔnsɔɛ bɛ Masenyi nde yi Kitaabui xa fe ra

Kabi dunija sa daa, Alatala na a xa seriye masenfe adamadie bɛ. Namijɔnmɛ xungbee naxa Ala xui mɛ, e fa na dentɛge sa mixie bɛ. Iburahima, Isiyaga, Yaxuba, Yusufu, Munsa, Yosuwe, Dawuda, Sulemani, Esayi, nun Esidirasi, nee birin findixi mixi binyee nan na Ala naxee rawalixi alako a xa seriye xa kolon, a xa sɛbɛ Kitaabui kui. A dɔnxɔɛ ra Ala naxa a xa masenyi nde so Annabi Isa yi ra, naxan findixi a xa Mixi Sugandixi ra dunija birin bɛ.

Isa fatanxi Eburu bɔnsɔɛ nan na alɔ namijɔnmɛ dangixie. A naxa na seriye birin natinmɛ alɔ Ala nu wama a xɔn ma ki naxɛ. Kɔnɔ Ala nu bara masenyi nɛɛnɛ nde so Isa yi ra, Eburu bɔnsɔɛ mu nu naxan kolon sinden. Na masenyi mu Ala xa seriye singe matandixi de, a a rakamalixi nɛ.

Singe ra Ala nu bara saate xiri a tan nun adamadie tagi, kɔnɔ yunubi keren gbansan nu nɔma na saate kanade, mixi fa lɔɛ. Isa to fa dunija ma, Alatala naxa saate nɛɛnɛ xiri a tan nun adamadie tagi, naxan nɔma yunubie xafaride, mixi fa nɔ kisode.

Singe ra Ala nu bara sɛrɛxɛdubɛɛ ti a tan nun adamadie tagi, e xa findi mixie xa saabui ra. Kɔnɔ e to nu findixi adamadie ra, e fan naxa

yunubie raba alo booree, e naxa faxa. Na kui, e mu findi saabui fanyie ra. Isa to fa dunija ma, Alatala naxa a ti a tan nun adamadie tagi, a naxa findi dunija saabui fanyi ra. Yunubi yo mu nu na a ma. Faxε mu nu noma a makankande. Na kui, Ala naxa a xa fe ite, a xa dunija yamari sa keli Ala yirefanyi ma, a magoroxi dennaxε.

Singe ra Ala nu bara a masen mixie be a e xa xurusee ba serεxe ra e xa yunubie xa fe ra. Na naxa adamadie boje raxara dondoronti, konɔ a mu nɔ e xa yunubi xafaride yati yati. Isa to fa dunija ma, Alatala naxa a yamari a xa a yetε ba serεxe ra dunija be. Na kui, adamadie xa yunubie naxa xafari, mixie naxa kisi soto naxan mu kanama abadan.

Na birin a masenxi ne a Ala Isa xεxi ne alako a xa a xa seriye rakamali, a findi kisi ra bonsoε birin be. Xibaaru fanyi nan na ki. Ala xa na raso won boje kui, won xa fahaamui soto na ma, a a findixi kisi nan na won be. Amina.

## **Ala xa masenyi Eburu bonsoε be**

### *Ala xa xεera*

<sup>1</sup> Temui dangixi Ala naxa masenyi ti won benbae be namijonmεe saabui ra. A na raba ne sanmaya wuyaxi, a na raba ne ki wuyaxi ra.

<sup>2</sup> Konɔ yakosi, naxan findixi waxati donxoε ra, Ala a xa masenyi ti won be a xa Di saabui ra. A bara a xa Di findi dunija ke tongoma ra, a dunija daa a xa Di nan saabui ra. <sup>3</sup> Yi Di findixi Ala xa nore tofanyi nan na, a findixi Ala misaali yati nan na. A dunija bun tima a xa masenyi

senbema nan na. A to γε yunubie xafaride,  
a naxa a magoro Ala Nore Kanyi yirefanyi ma  
ariyanna kui.

<sup>4</sup> Na kui, a tide dangi malekee ra, a xili  
fisamante nan soto. <sup>5</sup> Ala mu a masenxi maleke  
yo be,

«N ma di nan i ra,  
to n bara findi i Baba ra.»

A mu a masenxi maleke yo be,

«N tan findima a Baba ra,  
a tan findima n ma di ra.»

<sup>6</sup> Ala to a xa Di fisamante ramini dunija, a  
naxa a fala,

«Ala xa malekee xa a batu.»

<sup>7</sup> A a masenxi malekee xa fe ra,  
«Ala xa malekee luma ne alo foye,  
a xa walikée luma ne alo te.»

<sup>8</sup> Kono a a masenxi ne a xa Di xa fe ra,  
«Ala, i xa mange kibanyi buma ne abadan.  
Tinxinyi nan findixi i xa mangeya tonxuma ra.

<sup>9</sup> Tinxinyi nan nafan i ma.

Naaxupa mu rafan i ma fefe ma.

Na nan a toxi, Marigi, i Marigi Ala bara i sugandi  
seewe kui.

I findixi fisamante nan na dangife i booree ra.»

<sup>10</sup> A man a masenxi ne,  
«Marigi, i bara dunija ti a fole ra,  
i tan nan koore daaxi.

<sup>11</sup> Koore nun boxi fama kanade,  
kono i tan buma ne abadan.  
E forima ne alo dugi.

<sup>12</sup> I koore nun boxi mafindima ne  
alo donma mafindima ki naxe.  
E fama ne masarade alo sose masarama ki naxe.  
Kono i tan mu masarama,

i xa fe mu ꞓonma abadan.»

<sup>13</sup> Ala mu a masenxi malekε yo bε,  
«I xa dɔxɔ n yirefanyi ma,  
han n xa gε i yaxuie ragorode i sanyi bun ma.»

<sup>14</sup> Malekεε tan findixi Ala xa walikεε nan na, fate mu na naxee bε, a naxee xεεma kisi ketongoe malide.

## 2

### *Ala xa serexe*

<sup>1</sup> Won xa won ꞓengi sa na masenyi xɔn ma a fanyi ra, won naxan mexi, alako won naxa kira bεꞓin. <sup>2</sup> Ala xa masenyi senbε nu gbo, a nu bara naxan so malekεε yi ra. Adamadi naxee na matandi, e naxa sare xɔrɔxɔε sɔtɔ. Xa nee sa sare xɔrɔxɔε sɔtɔ, <sup>3</sup> won tan go? Xa won kisi xungbe rabolo, won ma fe fa luma di? Won Marigi yati nan singe a masenxi won bε, mixi naxee a xui mexi e fan bara findi na seedee ra. <sup>4</sup> Ala bara e xa seedeꞓɔxɔya fari isa tɔnxumae ra, fe magaaxuxie, kaabanako mɔoli birin, nun buꞓae ra Xaxili Seniyenxi naxee fixi e ma a waxonki.

<sup>5</sup> Ala mu mangεya fima malekεε ma tina e xa dunija yamari, muxu dunija naxan xa fe falafe wo bε yi ki. <sup>6</sup> Yi seedeꞓɔxɔya sebexi Kitaabui kui:  
«Munse lanxi adama ma,  
i to i maꞓɔxunma a xa fe ma?  
Munse lanxi adama xa di ma,  
i to i ꞓengi sama a xa fe xɔn ma?»

<sup>7</sup> I bara a ragoro malekεε bun ma waxati don-doronti kui.

I bara dariyε nun binye fi a ma,

<sup>8</sup> i bara se birin lu a sanyi bun ma.»

Na kui, Ala to se birin sa a xa mangeya bun ma, sese mu na a mu naxan yamarima. Kono won mu se birin toma a xa mangeya bun ma sinden. <sup>9</sup> Won munse toma? Ala naxa Isa ragoro malekee bun ma waxati dondoronti kui, kono Isa xa faxe naxa findi xunnakeli nun binye ra a be. Na kui, Ala naxa hinne won na, a Isa faxa adamadi birin joxoe ra.

<sup>10</sup> Ala nan se birin daaxi, se birin na a tan nan be. A man wama adamadi gbegbe xa so a xa nore kui. Na kui, a nu lanma a xa e Rakisima xa fe rakamali toore ra. <sup>11</sup> Naxan adamadie raseniye nma, nun naxee raseniye nxi, e birin fatanxi Baba keren nan na. Na kui, a mu yaagi e xilide a ngaxakerenyie. <sup>12</sup> A naxa a masen, «N i xili masenma ne n ngaxakerenyie be, n i matoxoma ne jama tagi.» <sup>13</sup> A man naxa a masen, «N nan n ma lanlanteya sama Ala nan ma.» A man naxa a masen, «N na be, muxu nun die Ala naxee fixi n ma.»

<sup>14</sup> Na die to findi fate nun fase ra, Isa fan naxa a yete misaali e ra, alako a xa no Ibulisa xun nakanade a yete xa faxe saabui ra. Faxe senbe nu na Ibulisa nan yi ra. <sup>15</sup> Isa naxa a yete misaali a ngaxakerenyie ra alako a xa e ratanga faxe xa gaaxui ma e xa duniyeigiri kui, naxan luxi alo konyiya. <sup>16</sup> A na birin naba Iburahima bonsoe nan malife ra, a mu a raba malekee xa be. <sup>17</sup> Na nan a toxi a naxa a yete maniya a ngaxakerenyie ra, alako a xa no serexedube kuntigi wali rabade kinikini nun tinxinyi ra Ala be, a fa findi jama xa yunubie xafarima ra. <sup>18</sup> Isa fata mixie malide e xa maratantanyi kui, barima a fan maratantanyi

nun t̄ore kolon n̄e.

### 3

#### *Isa nun Annabi Munsa*

<sup>1</sup> Na kui, n ngaxakerenyi seniyenxie, wo tan naxee xilixi ariyanna ma, wo xaxili xa ti Isa ra, Ala xa x̄era nun a xa s̄erex̄edube kuntigi, won danxaniyaxi naxan ma. <sup>2</sup> A tinxin n̄e Ala b̄e, naxan nu bara a ti na wali ra, al̄o Annabi Munsa fan a rabaxi ki nax̄e Ala xa banxi kui. <sup>3</sup> Isa xa binȳe dangi Munsa gbe ra, al̄o banxiti xa binȳe dangixi a xa banxi ra ki nax̄e. <sup>4</sup> Banxi birin tixi mixi nde nan saabui ra, k̄on̄o Ala nan dunija birin daaxi. <sup>5</sup> Annabi Munsa findixi konyi dugut̄ege nan na Ala xa banxi kui, alako a xa seedeṛox̄oya ba masenyi xa fe ra naxan fama tide. <sup>6</sup> K̄on̄o Ala xa Mixi Sugandixi findixi Ala xa Di dugut̄ege nan na, naxan Ala xa banxi yamarima. Won tan fan findixi na banxi nan na, xa won lama Isa ra, xa won won xaxili tima a ra, na nan findixi won ma mat̄ox̄e ra.

<sup>7</sup> Na na a ra, wo xa wo j̄engi sa Ala Xaxili Seniyenxi xa masenyi x̄on ma. A s̄eb̄exi,

«Xa wo bara a xui rame to,

<sup>8</sup> wo naxa wo kobe raso a ra, al̄o wo a rabaxi ki nax̄e gbengberenyi ma.

Na temui a nu wo matofe n̄e,

k̄on̄o wo naxa a matandi.

<sup>9</sup> Menni wo benbae bara kata e xa n mato.

E naxa n ma wali to j̄e tongo naani bun ma.

<sup>10</sup> Na kui, n naxa x̄on̄o na waxati mixie ma.

N naxa a fala, «E b̄oje makuya n na temui birin, e mu n ma seriye kolon.»

<sup>11</sup> Na na a ra n naxa n kali x̄one kui,

«E mu soma n ma malabui kui feo!»

<sup>12</sup> N ngaxakerenyie, wo xa μεεni wo yete ma a fanyi ra alako wo βοηε naxa lu πααxupa nun danxaniyatarepa kui, wo fa gbilen Ala φοxο ra, Ala naxan na na. <sup>13</sup> Λοxο yo λοxο wo xa wo bore ralimaniya. Wo xa gbilen na ma λοxοε birin alako yunubi naxa fa wo ηο, wo βοηε fa balan Ala mabiri. <sup>14</sup> Xa won sa won xaxili tima Ala xa Mixi Sugandixi ra alo won a φολοxi ki naxe, lanyi bara lu won nun Isa tagi. <sup>15</sup> A σεβexi Kitaabui kui, «Xa wo bara a xui rame to, wo naxa wo kobe raso a ra, alo wo a rabaxi ki naxe wo to a matandi.»

<sup>16</sup> Nde Ala matandi, e to γε a xui ramede? Mixie xa mu a ra naxee mini Misira βοxi ra Annabi Munsa saabui ra? <sup>17</sup> Ala xοηο ηε ndee ma ηε tongo naani bun ma? Mixie xa mu a ra naxee yunubi rabaxi, e fa σοηο gbengberenyi ma? <sup>18</sup> Ala a kali nde βε a e mu soma a xa malabui yire? Mixie xa mu a ra naxee a matandixi? <sup>19</sup> Na kui, won bara a fahaamu a e xa danxaniyatarepa nan a niya e mu so.

## 4

### *Malabui danxaniyatοεε βε*

<sup>1</sup> Ala xa laayidi, a naxan tongo won βε sofe a xa malabude, na mu kanaxi. Wo xa fe birin naba alako sofe na malabude kui a naxa kana wo βε. <sup>2</sup> Won bara na xibaaru fanyi με alo booree a mexi ki naxe, κοηο a mu sese fanxi e ma e xa danxaniyatarepa xa fe ra. <sup>3</sup> Κοηο won tan naxee bara la a ra, won fama ηε sode na malabude kui. A σεβexi na xa fe ra,

«N to xɔnɔ e ma, n naxa n kali,  
e mu soma n ma malabude.»

Kɔnɔ Ala xa wali bara ɲɔn kabi duniɲa fɔle,  
<sup>4</sup> barima a seɓexi Kitaabui kui na lɔxɔe solofere  
nde xa fe ra,

«Lɔxɔe solofere nde Ala xa wali naxa kamali. A  
naxa a malabu.»

<sup>5</sup> A man seɓexi Kitaabui kui, «E mu soma n ma  
malabude.»

<sup>6</sup> Ala nu bara a ɲanige mixi ndee xa so a  
xa malabude kui, kɔnɔ na mixi singe naxee na  
xibaaru mɛxi, e mu so e xa danxaniyatareɲa xa  
fe ra. <sup>7</sup> Na nan a toxi Ala bara lɔxɔe gbete sugandi  
naxan findixi to ra. Na fe singe to bara dangi a  
xɔnnakuye ra, Ala man naxa a masen Dawuda  
saabui ra,

«Xa wo bara a xui rame to,  
wo naxa wo kobe raso a ra.»

<sup>8</sup> Xa a sa li Yosuwe nu bara malabui fi e ma  
nu, Ala man mu nu lɔxɔe gbete xa fe falama  
nu. <sup>9</sup> Han ya malabui luxi Ala xa ɲama be e  
mu naxan sɔtɔxi sinden. <sup>10</sup> Naxan soma Ala xa  
malabui kui, a a malabuma ne a xa wali birin  
ma, alɔ Ala malabuxi a xa wali kui ki naxe.

<sup>11</sup> Won xa fe birin naba sofe ra na malabui  
kui, alako mixi yo naxa bira tantanyi kui alɔ  
Isirayilakae a rabaxi ki naxe. <sup>12</sup> Ala xa masenyi  
senbe gbo, a walima mixi bɔɲe ma. A xaɲen  
dangife santidegema de firinyi ra. A soma  
won bɔɲe nun won sondonyi nan kui, a so  
won sɔɔra nun won nadɔxɔdee xɔn. A won  
sondonyi waxɔnfe nun maɲɔxunyi birin makiiti.

<sup>13</sup> Nimase yo mu nɔma a nɔxunde Ala ma. Ala fe  
birin toma ne, fe birin dentege fama sade a tan  
nan be.



<sup>14</sup> Isa, won ma serexedube kuntigi xungbe, Ala xa Mixi Sugandixi, a to so ariyanna kui, won fan xa bira won ma danxaniya foxo ra won bara naxan makenen. <sup>15</sup> Won ma serexedube kuntigi won ma senbetareya kolon, a kinikinixi won ma na nan ma. Sentane naxa kata a ratantande mooli birin na alo won tan, kono a mu a no. <sup>16</sup> Na na a ra, won xa won maso a xa hinne kibanyi ra lanlanteya ra, alako won xa kinikini nun hinne soto a temui.

## 5

### *Isa won ma serexedube kuntigi*

<sup>1</sup> Serexedube kuntigi birin tongoxi adamadie nan ya ma, a fa ti Ala xa wali ra adamadie be, alako a xa hadiya nun serexe mooli birin ba yunubie xa fe ra. <sup>2</sup> A mixie xa fe kolon naxee na dimi kui, e loxi, barima a fan na e ya ma, a tantanma. <sup>3</sup> A xa senbetareya a niyama ne a xa serexe ba a yete xa yunubie be, a nun jama xa yunubie xa fe ra.

<sup>4</sup> Mixi mu noma yi binye sotide a yete ra, fo Ala a xili alo a Haruna xili ki naxe. <sup>5</sup> Ala xa Mixi Sugandixi fan mu serexedube kuntigi binye soto a yete xa ra. Ala nan a fixi a ma, a falafe ra, «To i bara findi n ma di ra. N tan fan bara findi i Baba ra.»

<sup>6</sup> A man sebexi Kitaabui kui, «I bara findi serexedube ra abadan, Melekisedeki mooli.»

<sup>7</sup> Isa bara a xui ite Ala maxandi ra a xa dunijeigiri kui, a bara a makula, a na wafe. A na raba ne barima a a kolon a Ala nan nu noma a ratangade faxe ma. Ala bara a xa duba suxu,

barima a nu bara tin lufe a xa yaamari bun ma. <sup>8</sup> Isa findixi Ala xa Di nan na, kɔnɔ na kui a naxa a matinkan fo a xa Ala rabatu hali na findixi tɔɔrɛ nan na a bɛ. <sup>9</sup> Isa xa fe to kamali, a naxa findi saabui ra a mantonyie birin xa abadan kisi sɔtɔ. <sup>10</sup> Ala naxa a ti sɛrɛxɛdubɛ kuntigi ra Melekisedeki daaxi.

<sup>11</sup> Fe gbegbe na na kui muxu wama naxan masenfe wo bɛ, kɔnɔ na tagi rabafe xɔrɔxɔ, barima wo mu soma fee kui mafurenyi ra. <sup>12</sup> A nu lanma wo xa findi karamɔxɔ ra yi waxati, kɔnɔ han yakɔsi wo hayi na karamɔxɔ nde ma naxan wo xaranma Ala xa masenyi singee ra. Wo mu fata fe tilinxi fahaamude sinden, alɔ diyɔrɛ naxan mu fata sube donde, fo a xa xijɛ min sinden. <sup>13</sup> Mixi naxan hayi na Ala xa na masenyi singee ma, a mu gɛxi tinxinyi kolonde, a mu mɔxi a xa danxaniya kui. A luxi alɔ diyɔrɛ naxan xijɛ gbansan minma. <sup>14</sup> Kɔnɔ mixi naxan mɔxi a xa danxaniya kui, naxan bara gɛ tinxinyi nun tinxintareya tagi raba kolonde, a nɔma nɛ xaranyi tilinxi fan kolonde. A tan luxi alɔ xɛmɔxi naxan baloma sube fanyi ra.

## 6

### *Ala xa sɛriye tilinxi*

<sup>1</sup> Na nan a toxi won lanma won xa siga yare ma Ala xa Mixi Sugandixi xa xaranyi kui. Won xa dangi na masenyi singee ra, won xa so fe tilinxie kui. Na masenyi singee nan ya: wali jaaxi bɛpinfe naxan mixi xaninma yahannama, <sup>2</sup> danxaniyafe Ala ma, xunxafe ye xɔɔra, bɛlɛxɛ safe mixie ma, kelife faxɛ ma, nun Ala xa kiiti

dɔnɔɔ. <sup>3</sup> Xa Ala tin, won xa siga yare ma won ma xaranyi kui.

<sup>4</sup> Mixi naxan bara ge Ala xa naiyalanyi tode, naxan bara Ala xa ki nɛmunɛmun, Ala Xaxili Seniyenxi bara lu naxan be, <sup>5</sup> naxan bara a kolon a Ala xa masenyi fan, naxan bara Ala senbe kolon naxan fama rawalide waxati naxan sa fama, <sup>6</sup> xa a sa li na mixi mooli bara danxaniya bejin, a mu noɔma tuubide soɔnɔn. A luxi alo a man bara Ala xa Di mabanban wuri magalanbuxi ma, a fa a rayaagi nama ya xori.

<sup>7</sup> Bɔxi naxan bara tune ye soɔo a fanyi ra, a fa sansi ramini a kanyi be, Ala baraka ragoroma ne a ma. <sup>8</sup> Kɔnɔ bɔxi naxan tunbe nun jooge tun naminima, na bɔxi mu fan. A gbe mu luxi a xa danka, a ranɔnyi a fa gan.

<sup>9</sup> Muxu xanuntenyie, hali muxu xa woɔyenyi xoroɔo, muxu bara la a ra wo na kira fanyi nan xɔn, naxan findi kisi kira ra. <sup>10</sup> Ala tinxin, a mu nɛemuma wo xa wali ma. A wo xa xanunteya kolon, wo naxan masenxi wo xa wali kui a xili ra, a nun wo naxan masenxi seniyentɔee be. Han ya wo na na wali nan kui. <sup>11</sup> Muxu wama ne wo xa wo tun nabexi na birin kui han a ranɔnyi, alako wo xa fe soɔo wo wo xaxili tixi naxan na. <sup>12</sup> Wo naxa wo tun naxoɔo. Wo xa bira danxaniyatɔee xa misaali foɔo ra, naxee ke soɔoma Ala naxan laayidixi e be. E na soɔoma e xa danxaniya nun e xa tun nabexi nan saabui ra.

<sup>13</sup> Ala to laayidi tongo Iburahima be, a mu no a kalide fe nde ra naxan gbo a be. Na na a ra, a naxa a kali a yete ra, <sup>14</sup> a falafe ra, «N baraka sama ne i xa fe. I bɔnsɔe wuyama ne.»

<sup>15</sup> Iburahima to ge mame tide, Ala naxa a xa laayidi rakamali a be. <sup>16</sup> Adama a kalima fe nde ra naxan gbo a be. Na marakali senbe fima ne a xa woyenyi ma, alako mixi naxa no na matandide. <sup>17</sup> Na nan a toxi, Ala fan naxa a rakali alako mixie, na laayidi tongoxi naxee be, e xa a kolon Ala xa nate mu masarama. <sup>18</sup> Ala naxa na laayidi tongo, a man naxa a rakali, alako won xa no limaniya xungbe soto. Wule yo mu na na fe firinyi kui. Won bara fe birin nabolo a xa fe ra, won fa won xaxili ti a ra. <sup>19</sup> Mixi xaxili tife Ala ra, a luma ne alo hanga naxan banbanxi ye bun ma. Won fan won xaxili tima Ala ra na ki ne naxan na a xa horomolingira kui dugi gbakuxi xanbi ra, <sup>20</sup> Isa soxi dennaxe won ya ra, a xa findi won ma serexedube kuntigi ra abadan, alo Melekisedeki.

## 7

### *Serexedube Melekisedeki*

<sup>1</sup> Melekisedeki nan nu na Salamu mange ra, a man nu findixi Ala Xili Xungbe Kanyi xa serexedube nan na. Iburahima to ge mange ndee xun nakanade, Melekisedeki naxa sa naralan a ra, a duba a be. <sup>2</sup> Iburahima naxa farile fi a ma. Melekisedeki xili fasarixi yi ki «mange tinxixi.» A man nu findixi Salamu mange nan na, naxan xili fasarima yi ki «bojesa mange.» <sup>3</sup> A baba mu kolon, a nga mu kolon, a xa taruxui mu kolon. A xa simaya foloxi temui naxe, a nun a non temui, na fan mu kolon. Na kui, a luxi ne alo Ala xa Di, naxan findixi serexedube ra abadan.

<sup>4</sup> Wo a mato Melekisedeki tide nu gboxi ki naxe. Hali won baba Iburahima, a naxan soto

a wasaso se ra, a naxa na farile fi a ma. <sup>5</sup> Ala xa seriye a falama pama xa farile so Lewi bɔnsɔɛ yi ra, naxan findixi sɛrɛxɛdubɛɛ ra. Na pama fan kelixi Iburahima bɔnsɔɛ nɛ, e findi Lewi ngaxakerenyie nan na.

<sup>6</sup> Kɔnɔ Melekisedeki tan, hali a to mu nu na Lewi bɔnsɔɛ xa taruxui kui, Iburahima naxa farile so a yi ra. Melekisedeki naxa duba Iburahima laayidi kanyi bɛ. <sup>7</sup> Birin a kolon mixi naxan dubama a boore bɛ, a tide gbo na kanyi bɛ.

<sup>8</sup> Lewi xa mixi naxee farile rasuxuma, e faxama nɛ, kɔnɔ Melekisedeki tan mu faxaxi. <sup>9</sup> Na kui, a luxi nɛ alɔ Lewi, naxan luma farile rasuxu ra, a nu bara farile fi Melekisedeki ma Iburahima saabui ra, <sup>10</sup> barima Lewi bɔnsɔɛ nu na a benba Iburahima fate i, a naralan Melekisedeki ra tɛmui naxɛ.

<sup>11</sup> Xa a sa li fe birin nu nɔma kamalide Lewi bɔnsɔɛ xa sɛrɛxɛdubɛɲa saabui ra nu, pama Ala xa seriye sɔtɔxi naxan na, e hayi mu nu na Melekisedeki xa sɛrɛxɛdubɛɲa ma nu, naxan mu fatanxi Haruna bɔnsɔɛ ra. <sup>12</sup> Sɛrɛxɛdubɛɲa na masara, yaamari fan xa masara.

<sup>13</sup> Yi masenyi birin falaxi mixi naxan ma fe ra, a kelixi bɔnsɔɛ nɛ sɛrɛxɛdubɛ mu na bɔnsɔɛ naxɛ. <sup>14</sup> Birin a kolon a won Marigi kelixi Yuda bɔnsɔɛ nɛ. Annabi Munsa mu yaamari yo fi na bɔnsɔɛ mixie ma e xa sɛrɛxɛdubɛ wali raba.

<sup>15</sup> Muxu naxan masenxi, a fiixe, barima sɛrɛxɛdubɛ gbete bara mini, naxan maniya Melekisedeki ra, <sup>16</sup> naxan mu findixi sɛrɛxɛdubɛ ra a bɔnsɔɛ xa fe ra. Na kanyi findixi sɛrɛxɛdubɛ

ra, barima faxe mu nɔ a ra. <sup>17</sup> Yi seedeɲɔɔya bara raba a xa fe ra,

«I findixi sereɲedube nan na abadan,  
Melekisedeki daaxi.»

<sup>18</sup> Yaamari singe bara ba na a xa senbetareya xa fe ra, a mu nu nɔma a xa wali rabade. <sup>19</sup> Na yaamari mu nɔ fefe rakamalide, kɔnɔ fe nɛɛɛ bara mini won xaxili tima naxan na, naxan nɔma won malide won makɔrede Ala ra.

<sup>20</sup> Na fe nɛɛɛ mu tixi marakali xanbi. <sup>21</sup> Sereɲedube singee bara wali suxu marakali xanbi, kɔnɔ Isa nan findixi sereɲedube ra yi marakali ra Ala naxan masenxi,

«Marigi bara a kali, a mu a xa nate masarama:  
I tan nan findixi sereɲedube ra abadan.»

<sup>22</sup> Na kui, Ala bara saate tongo won be Isa saabui ra, naxan fan boore be.

<sup>23</sup> Na xanbi, sereɲedube singee nu wuya, barima e to faxa, mixi gbeteɛ nu tima e ɲɔɔɛ ra.

<sup>24</sup> Kɔnɔ Isa tan mu faxama, a buma ne abadan. A xa sereɲedubeɲa mu radangima mixi gbeteɛ ma.

<sup>25</sup> Na nan a toxi a nɔma mixi rakiside naxan a makɔrema Ala ra a tan saabui ra. A ɲiɲe to a ra, a nɔma findide e xa saabui fanyi ra Ala yire abadan.

<sup>26</sup> Won hayi na na sereɲedube kuntigi mooli nan ma naxan seniyeɲ, yunubi mu na naxan ma, naxan mu fe ɲaaxi yo kolon, naxan mu luma yunubitɔɛɛ ya ma, naxan xa fe itexi dangife koore ra. <sup>27</sup> Isa mu luma alɔ boore sereɲedube kuntigie, naxee lanma e xa sereɲe ba lɔɔɔ yo lɔɔɔ e xa yunubie xa fe ra, a nun ɲama xa yunubie xa fe ra. A tan bara a yete ba sereɲe ra kerenyi ra. <sup>28</sup> Yaamari singe nu mixi senbetaree nan tima

serexedube kuntigie ra, kɔnɔ na marakali nɛnɛ naxan faxi na yaamari singe dangi xanbi, a bara Ala xa Di ti serexedube kuntigi ra, naxan bara gɛ kamalide abadan.

## 8

### *Ala xa saate nɛnɛ*

<sup>1</sup> Masenyi xunyi nan ya: Won ma serexedube kuntigi magoroxi Ala Xili Xungbe Kanyi xa kibanyi yirefanyi ma ariyanna kui. <sup>2</sup> A walima Ala xa hɔrɔmɔlingira yati yati nan kui, Marigi naxan tixi, adamadie belexe fɔxi mu naxan na.

<sup>3</sup> Serexedube kuntigi birin lanma a xa serexe mɔoli birin ba Ala bɛ. Na kui a nu lanma se nde xa lu yi serexedube fan yi ra a naxan bama serexe ra. <sup>4</sup> Xa won ma serexedube kuntigi nu na dunija nu, a mu nu findima serexedube ra nu, barima Ala xa yaamari jan bara mixi gbeteɛ ti na serexe wali ra.

<sup>5</sup> Na mixie Ala batuma hɔrɔmɔlingira nan kui, naxan misaalixi hɔrɔmɔlingira ra naxan na ariyanna. Na nan a toxi Ala naxa Annabi Munsa yamari hɔrɔmɔlingira tife ra, a falafe ra,  
«A mato a fanyi ra,  
i xa hɔrɔmɔlingira ti  
alo a masenxi i bɛ geya fari ki naxe.»

<sup>6</sup> Kɔnɔ yakɔsi Ala xa Mixi Sugandixi bara wali soto naxan tide gbo boore serexedubɛɛ xa wali bɛ tife ra Ala nun adamadie tagi. A tide gbo barima a faxi saate naxan na, na fan saate fori bɛ. A xa saate mabanbanxi laayidie nan na, naxee fan dangi laayidi forie ra.

<sup>7</sup> Xa na saate singe nu noma a xa wali rabade nu, Ala mu fama a firin nde ra nu. <sup>8</sup> Ala naxa yi marakɔɔsi raba jama ra,  
«Marigi xa masenyi nan ya:

Waxati na fafe,  
n saate neene tongoma Isirayila nun Yudaya  
jama be temui naxe.

<sup>9</sup> Na mu luma alo na saate singe  
n naxan tongo e benbae be,  
n e ramini Misira boxi ra temui naxe.  
E to n ma saate bejin,  
n fan naxa e bejin.

Marigi xa masenyi nan na ki.

<sup>10</sup> Saate nan ya n naxan tongoma Isirayila jama  
be,  
na waxati dangi xanbi.

Marigi xa masenyi nan ya:  
N nan n ma seriye rasoma ne e xaxili kui,  
n a sebe e sondonyi ma.  
N findima e Marigi Ala nan na,  
e fan findi n ma jama ra.

<sup>11</sup> Mixi yo mu a boore matinkanma,  
mixi yo mu a falama a ngaxakerenyi be,  
«I xa Ala kolon,»  
barima na waxati e birin n kolonma ne,  
kelife mixi xuri ma han mixi xungbe.

<sup>12</sup> N dipema ne e xa tinxintareya ma,  
n e xa yunubie xafarima ne.»

<sup>13</sup> A to yi saate xili fala saate neene, a bara boore findi saate fori ra. Saate fori tan lanma a xa ba na, a tide mu na sonon.



## 9

*Ala xa Mixi Sugandixi xa serexe*

<sup>1</sup> Saate singe bun ma, yaamari ndee nu na batui xa fe ra, nun Ala xa hɔrɔmɔlingira xa fe ra, naxan nu na dunija. <sup>2</sup> Na hɔrɔmɔlingira to ti, yire nde nu na naxan nu xili yire seniyeŋxi. Lanpui nu na a kui, a nun teebili serexe taami nu saxi naxan ma. <sup>3</sup> Yire seniyeŋxi firin nde nu na dugi gbakuxi xanbi ra, naxan nu seniyeŋ dangife boore ra. <sup>4</sup> Surayi ganse xeema daaxi nun saate kankira nu na na yire kui. Xeema nu saxi saate kankira birin ma. Tɔnbili xeema daaxi mana nu ragataxi naxan kui, Haruna xa xuli naxan fuga, a nun walaxee, saate sebexi naxee ma, e birin nu na na saate kankira kui. <sup>5</sup> Ala xa maleke nɔrɔxi masolixi firinyi nu tixi saate kankira fari, e yunubi xafari yire makoto. A mu lanma won xa so na woyenyi birin kui yakɔsi.

<sup>6</sup> Na yire to ge yailande na ki, serexedubee nu luma so ra na yire seniyeŋxi singe nan kui, e e xa wali raba naa. <sup>7</sup> Kɔnɔ serexedube kuntigi nan gbansan nu noma sode na yire seniyeŋxi firin nde kui. Ne yo ne a nu soma naa sanmaya keren, a wuli xanin a xa yunubie nun jama xa yunubie xa fe ra e naxan naba a kolontareya ma. <sup>8</sup> Na kui, Ala Xaxili Seniyeŋxi nu wama a masenfe ne a yire naxan nu seniyeŋ dangife yire birin na, a menni mu nu rabixi mixie be na hɔrɔmɔlingira singe xa waxati. <sup>9</sup> Na birin findixi misaali nan na yi waxati mixie be. A a masenma a na serexe birin mu noma batulae xaxili raseniyeŋde. <sup>10</sup> Na yaamari singee, donse, minse, nun sali ye xa fe

ra, e nu fixi mixie ma e xa yunubie nan xa fe ra, han waxati nɛɛɛ fama tɛmɛi naxɛ.

<sup>11</sup> Ala xa Mixi Sugandixi to findi won ma sɛrɛxɛdubɛ kuntigi ra, a bara fa hɛɛri ra, a naxan sɔtɔ won bɛ. A bara so Ala xa hɔrɔmɔlingira fanyi kui, adamadi mu naxan yailanxi yi bɛndɛ fupɪ fari. <sup>12</sup> Kɔnɔ a mu so si kontonyi nun ninge wuli xa ra, a so na yire sɛniyenxi fisamante kui a yetɛ wuli nan na. A so nɛ kerenyi ra, barima na nu findixi xunsare nan na adamadi bɛ naxan mu jɔnma abadan. <sup>13</sup> Xa si kontonyi nun tura wuli, a nun tɛ xube naxan fatanxi ninge sɛrɛxɛ ra a sa mixi sɛniyantaree ma, xa na fe mɔoli nɔma mixi rasɛniyɛndɛ nu, <sup>14</sup> Ala xa Mixi Sugandixi wuli mu dangima xɛ na ra? A naxa a yetɛ ba sɛrɛxɛ kamalixi ra Ala bɛ, Ala Xaxili Sɛniyenxi xa yaamari bun ma, alako a xa won xaxili rasɛniyen wali jaaxie ma, naxee won faxama. A na raba nɛ won bɛ alako won xa Ala Njɪɛ batu.

<sup>15</sup> Na kui, a bara findi saabui ra yi saate nɛɛɛɛ xa fe ra, mixi xilixie xa kɛ sɔtɔ naxan buma abadan, alɔ a laayidixi e bɛ ki naxɛ. A faxa na nan ma, a findi xunsare ra yunubie xa fe ra naxee rabaxi na saate fori xa waxati bun ma. <sup>16</sup> Saate naxan findi kɛ fe ra, na mu kamalima sinden, fo saate tongoma faxa. <sup>17</sup> Kɛ mu nɔma sɔtɔdɛ beenun saatetongoe xa faxa. A mu sɔtɔma saatetongoe baloxi tɛmɛi naxɛ. <sup>18</sup> Na nan a toxi na saate singe mu tongoma wuli xanbi. <sup>19</sup> Annabi Munsa to Ala xa sɛriyɛ masen jama bɛ, a naxa ningee nun si kontonyie wuli tongo, a nun ye, a fa na kasan Kitaabui nun jama ma se nde ra naxan yailanxi hisopi burɛxɛ nun yɛxɛɛ xabɛ gbeeli

ra, a fa a fala, a naxe, <sup>20</sup> «Wuli nan ya naxan saate xirima wo nun Ala tagi.» <sup>21</sup> Annabi Munsa man naxa wuli kasan h̄or̄om̄olingira ma, a nun h̄or̄om̄olingira yirabase birin ma. <sup>22</sup> A seriye ki ma, fayida se birin naseniyenma wuli nan na. Yunubi mu xafarima wuli ifili xanbi.

<sup>23</sup> A nu lanma se naxee misaalixi fee ra ariyanna kui, e xa raseniyen serexee ra. Ariyanna xa maraseniyenyi rabama serexee nan na naxee fan booree be. <sup>24</sup> Ala xa Mixi Sugandixi mu soxi h̄or̄om̄olingira xa kui adamadie naxan yailanxi, naxan misaalixi h̄or̄om̄olingira ra naxan na ariyanna. A so ariyanna yati nan kui, alako a xa won ma dentege sa Ala be. <sup>25</sup> A mu soxi naa sanya wuyaxi, al̄o serexedube kuntigi naxan soma Ala xa h̄or̄om̄olingira kui je yo je wuli nde ra, naxan mu findixi a gbe ra. <sup>26</sup> Xa a nu na ki ne nu, Ala xa Mixi Sugandixi nu lanma ne a xa t̄ōōō sanmaya wuyaxi kabi duniya fole ra. K̄ōō na mu a ra. Yakosi yi waxati d̄ōn̄x̄e, a naxa mini sanmaya keren, alako a xa yunubi xa fe kana a yete serexee saabui ra. <sup>27</sup> Adamadie faxama ne sanya keren, e fa makiiti. <sup>28</sup> Ala xa Mixi Sugandixi fan bara faxa sanmaya keren, alako a xa yunubi ba mixi gbegbe ma. A man fama ne a firin nde, k̄ōō na waxati a mu fama yunubie xa fe xa ra, a fama mixie nan be naxee xaxili tixi kisi ra.

## 10

### *Isa xa serexe*

<sup>1</sup> Annabi Munsa xa seriye misaalixi fe fanyi nan na naxan fama fade. A findixi misaali

gbansan nan na. Na nan a toxi a Annabi Munsa xa seriyε mu nōma Ala batulae raseniyende kerenyi ra, na serεxεε saabui ra naxee bama jε yo jε. <sup>2</sup> Xa a sa li a nu nōma e raseniyende nu, mixie mu nu luma serεxεε ba ra tēmui birin, barima serεxεε keren gbansan nu nōma e xa yunubi birin xafaride kerenyi ra, na yunubi xa fe maṛoxunyi yati mu luma e xunyi. <sup>3</sup> Kōṅ jε yo jε na serεxεε findima maratuse nan na mixie bε a yunubie na e ma. <sup>4</sup> Tura nun si kontonyi wuli mu nōma yunubie bade.

<sup>5</sup> Na nan a toxi, Ala xa Mixi Sugandixi to so dunija, a naxa a masen Ala bε,  
«I mu wama serεxεε xōn.  
I mu wama hadiya xōn.  
I bara fate yailan n bε.

<sup>6</sup> I mu wama serεxεε gan daaxi xōn ma,  
i mu wama serεxεε yunubi xafari daaxi fan xōn ma.

<sup>7</sup> N naxa a masen, «N bara fa.  
A seβexi n ma fe ra Kitaabui kui,  
Ala, n na fafe i sago rabade.»

<sup>8</sup> Singe a naxa a masen,  
«I mu wama serεxεε yo xōn ma.  
E mu rafan i ma.  
I mu wama hadiya yo xōn ma.  
I mu wama serεxεε gan daaxi xōn ma,  
i mu wama serεxεε yunubi xafari daaxi fan xōn ma.»

A nu bara na fala hali na yaamari to nu toma a xa seriyε kui. <sup>9</sup> Na dangi xanbi, a bara a masen,  
«Ala, n na be. N bara fa i sago rabade.»  
Na kui, a naxa fe singe ba na, alako fe firin nde xa ti. <sup>10</sup> Na janige nan a niyaxi won naseniyenxi

Ala xa Mixi Sugandixi Isa fate saabui ra, naxan baxi serexε ra kerenyi ra.

<sup>11</sup> Serexedube birin e xa wali rabama loxo yo loxo. E luma serexεe ba ra naxee mu noma yunubie xafaride. <sup>12</sup> Kono Isa tan, a to γε serexεe keren bade yunubie xa fe ra, a naxa a magoro Ala yirefanyi ma, a luma dennaxe abadan. <sup>13</sup> A na a mamεfe a xa ti a yaxuie ma, <sup>14</sup> barima a bara mixie rakamali kerenyi ra, a naxee raseniyenxi a xa serexεe kerenyi saabui ra.

<sup>15</sup> Ala Xaxili Seniyenxi na tagi rabama won be yi masenyi ra. A singe, a naxa a masen,

<sup>16</sup> «Saate nan ya n naxan tongoma Isirayila  
bonsεe be:

Na waxati na dangi,

n nan n ma seriyε luma ne e boje ma,

n na sebema ne e sondonyi ma.»

<sup>17</sup> A man naxa a masen,

«N mu ratuma e xa yunubie

nun e xa wali kobie ma sonon.»

<sup>18</sup> Yunubi na γε xafaride temui naxe, serexεe mu bama na yunubi xa fe ra sonon.

<sup>19</sup> N ngaxakerenyie, na kui won bara limaniya soto sofe ra na yire seniyenxi fisamante kui Isa wuli saabui ra. <sup>20</sup> Isa bara na kisi kira neene rabi won be, alako won xa dangi na dugi ra naxan gbakuxi hɔrɔmolingira kui a fate saabui ra. <sup>21</sup> Won ma serexedube kuntigi to tixi Ala xa banxi xunyi ra, <sup>22</sup> won xa won makore Ala ra boje fixe nun danxaniya ra. Na danxaniya won nalimaniyama ne, barima won boje raseniyenxi won ma yunubie ma, won fate fan maxaxi ye tinsε ra. <sup>23</sup> Won xa won xaxili ti Ala ra tunnabexi

kui, barima naxan laayidi tongoxi won be, a mu noma na kanade. <sup>24</sup> Won xa meeni won bore ma, alako won xa won bore ralimaniya won xa lu xanunteya nun wali fanyi kui. <sup>25</sup> Won naxa won ma malanyie rabolo de, alo ndee na a rabafe ki naxe. A lanma won xa won bore ralimaniya. Won to a kolon Ala xa loxe na fafe, won naxa tagan na ma.

<sup>26</sup> Xa a sa li, won Ala xa nondi kolon, konon won man nu fa lu yunubi raba ra won janige ra, serexe gbete mu na sonon naxan noma won ma yunubie xafaride, <sup>27</sup> fo gaaxui xungbe Ala xa kiiti ya ra, naxan findima te mankanε ra a matandilae be. <sup>28</sup> Xa mixi nde Annabi Munsa xa seriye matandi, e a faxama ne kinikinitareja kui, seede firin xa na mu a ra saxan xa seedeoxoya saabui ra. <sup>29</sup> Konon naxankate dangima na tan na mixie be, naxee Ala xa Di maboronma e sanyi ra, e a xa saate wuli rasoto naxan e raseniyanxi, e Ala Xaxili rasotoma naxan hinnexi e ra. <sup>30</sup> Won yi masenyi kanyi kolon,

«N tan nan mixi gberoxoma,

n tan nan e sare fima e ma.»

A man sebexi, «Marigi fama ne a xa jama makiitide.» <sup>31</sup> Ala Nije xa naxankate magaaxu.

<sup>32</sup> Wo xa ratu na loxe singee ma. Wo to naiyalanyi to, wo naxa wo tunnabexi gere xoxoxe kui naxan findixi toore ra wo be. <sup>33</sup> E naxa wo konbi, e naxa wo naxankata jama ya xori. Wo fan naxa lu mixie seeti ma, naxee bara na toore mooli soto. <sup>34</sup> Wo naxa kinikini geelimanie ma, wo naxa tin a ra seewe kui e xa wo harige ba wo yi ra, barima wo a kolon harige

nde na wo be naxan dangi na boore ra pon, a bu abadan.

<sup>35</sup> Wo naxa fe rabolo, wo xaxili tixi naxan na, barima na sare gbo. <sup>36</sup> Wo hayi na tun nabexi ma, alako wo xa Ala sago rakamali, wo fa fe soto a naxan laayidixi wo be. <sup>37</sup> A sebexi, «A gbe mu luxi sonon.

Naxan lanma a xa fa, a fama ne, a mu dugundima.

<sup>38</sup> N ma tinxintoe kisima ne danxaniya saabui ra. Kono xa a sa li a man naxa gbilen xanbi, n mu jalexinma a xa fe ra.»

<sup>39</sup> Won mu findixi fe rabejinyie xa ra, naxee xa fe xun nakanama. Won tan findixi danxaniyatoe nan na, naxee kisima.

## 11

### *Danxaniya*

<sup>1</sup> Danxaniya kanyi, a a xaxili tima fe nde ra a laxi naxan na. Hali a mu na fe toma a ya ra, a a kolon nondi nan a ra. <sup>2</sup> Won benbae xili fanyi soto na nan ma.

<sup>3</sup> Danxaniya saabui ra, won a kolon a Ala nan dunja daaxi a xa masenyi ra. Se naxan toma naa a fatanxi fe nan na naxan mu toma.

<sup>4</sup> Danxaniya saabui ra, Habila naxa serexe ba Ala be naxan nu fan dangife Kabila gbe ra. Ala naxa na serexe suxu, a Habila findi tinxintoe ra a xa danxaniya saabui ra. Hali Habila to faxaxi, a naxan nabaxi danxaniya ra na findima ne masenyi ra won be.

<sup>5</sup> Danxaniya saabui ra, Enoki naxa te koore ma, a mu faxes. Mixi yo mu no a tode, barima Ala nu

bara a rate koore ma. Beenun a xa te, Ala nu bara a masen a Enoki rafan a ma. <sup>6</sup> Mixi mu noma rafande Ala ma danxaniya xanbi. Mixi naxan a makorema Ala ra, a lanma a xa la a ra a Ala na na, a nun a xa la a ra a Ala mixie nan sare fima naxee a fenma.

<sup>7</sup> Danxaniya saabui ra, Nuha naxa kunkui banban alako a xa denbaya xa kisi. Ala nu bara banbaranyi xa fe fala a be beenun a xa duniya li. Nuha nu gaaxu Ala ya ra. A xa danxaniya a masenma kiiti bara kana duniya be. Nuha naxa tinxinyi soto ke ra a xa danxaniya saabui ra.

<sup>8</sup> Danxaniya saabui ra, Iburahima naxa Ala xui ratinme sigafe ra boxi ma a mu dennaxan kolon, alako a xa menni soto ke ra. <sup>9</sup> Danxaniya saabui ra, Iburahima naxa sabati na boxi ma, Ala nu bara naxan laayidi a be. A naxa lu menni alo xone a xa kiri banxie kui, alo Isiyaga nun Yaxuba, naxee findixi na ketongoe ra. <sup>10</sup> A nu na a mamefe a xa taa senbema soto, Ala taa naxan korinxi, a a ti.

<sup>11</sup> Danxaniya saabui ra, Sara dibaritare fan naxa no di baride nelaxeforija kui, barima a nu laxi a ra a Ala mu a xa laayidi kanama. <sup>12</sup> Na nan a to, xeme keren saabui ra, xemoxi naxan mu nu noma di sotide sonon, na naxa bonsoe xungbe soto, «naxan xasabi maniyaxi tunbuie xasabi ra naxee na koore ma, a nun meyenyi xasabi ra naxan na baa de ra. E konti mu noma kolonde.»

<sup>13</sup> Yi mixie bara faxa e xa danxaniya kui, e mu fee soto naxee nu laayidixi e be. E nu laxi a ra a fanyi ra, a na laayidie mu kanama. E nu a kolon a e findixi «xone nan na duniya bende fupi fari.» <sup>14</sup> Mixi naxee na fe moolie falama, e



a masenfe ne a e na taa gbete fenfe e sabatima dennaxe. <sup>15</sup> Xa e kelide xoli nu bara e suxu nu, e nu noma gbilende naa. <sup>16</sup> Kono e nu taa gbete fenma naxan fan e kelide be, taa naxan na ariyanna. Na kui, Ala mu yaagixi e ra, e xa a xili e Marigi Ala, barima a nu bara taa yailan e be.

<sup>17</sup> Danxaniya saabui ra, Iburahima mu tondi Isiyaga bade serexe ra, Ala nu a matoma temui naxe. A mu tondi a xa di kerenyi bade serexe ra, di naxan nu laayidixi a be, <sup>18</sup> Ala nu bara a fala naxan ma fe ra,

«Isiyaga nan findima i bonsoe ra,  
i xili luma naxan xun ma.»

<sup>19</sup> Iburahima nu a kolon a Ala senbe gbo, hali Isiyaga faxa, a nu noma na rakelide faxe ma. Fayida na nan naba misaali ra, barima Ala a xa di ragbilen ne a ma.

<sup>20</sup> Danxaniya saabui ra, Isiyaga naxa duba Yaxuba nun Esayu be e xa simaya xa fe ra.

<sup>21</sup> Danxaniya saabui ra, Yaxuba naxa duba Yusufu xa die be, a nu luxi dondoronti a xa faxa. A naxa Ala batu, a yi masuxuxi a xa xuli ra.

<sup>22</sup> Danxaniya saabui ra, Yusufu naxa masenyi ti a xa saya makore, a lanma e xa naxan naba a fure ra Isirayilakae minima Misira boxi ra temui naxe.

<sup>23</sup> Danxaniya saabui ra, Munsa to bari, a barimae naxa a noxun kike saxan bun ma a xa tofanyi xa fe ra, e mu gaaxu mange xa yaamari ya ra. <sup>24</sup> Danxaniya saabui ra, Munsa to mo, a naxa tondi findide Firawuna xa di gine xa di ra. <sup>25</sup> A naxa wa a xon ma, a xa toore soto Ala xa pama ya ma, dine a xa jalexin yunubi ra

waxati dunkedi bun ma. <sup>26</sup> A bara a kolon Ala xa Mixi Sugandixi xa magore nan fan dangi Misira naafuli ra. A nu sare matoma a fama naxan sotoɔde yare. <sup>27</sup> Danxaniya saabui ra, Munsa naxa keli Misira boxi ma, a mu gaaxu Firawuna xa xone ya ra. A naxa a tun nabexi, barima a nu gaaxuxi Ala nan ya ra, naxan mu toma. <sup>28</sup> Danxaniya saabui ra, Munsa naxa Sayamaleke Dangi Sali raba, a wuli kasan naadɛe ma, alako sayamaleke naxa Isirayilakae xa di singee faxa.

<sup>29</sup> Danxaniya saabui ra, Isirayilakae naxa Xu-lunyumi baa igiri a xaraxi ra. Misirakae to bira e foxo ra, e naxa madula ye xora.

<sup>30</sup> Danxaniya saabui ra, Yeriko tete naxa bira a yete ra, Isirayilakae to ge a rabilinde xi solofere bun ma.

<sup>31</sup> Danxaniya saabui ra, langoe gine Raxabi naxa kisi kaafirie ya ma, barima a nu bara Isirayilaka yire rabenyie yigiya a fanyi ra.

<sup>32</sup> N munse sama na fari sonon? Waxati mu luma n be n xa Gedeyon, Baraki, Samison, Yefite, Dawuda, Samuweli, nun namijonmee xa fee fala. <sup>33</sup> Danxaniya saabui ra, e naxa no mangataae ra, e naxa jere tinxinyi kui, e naxa fe laayidixi soto, e naxa no yete xaapee ra, <sup>34</sup> e naxa ratanga te xungbe nun santidegema ma, e xa senbetareya naxa findi senbe ra, e naxa senbe soto gere kui, e fa soori galie keru. <sup>35</sup> Gine ndee naxa e ngaxakerenyi faxaxie to, naxee rakelixa faxe ma. Mixi ndee naxa paxankata, e tondi minide na toore kui, alako e xa marakeli fanyi soto. <sup>36</sup> Mixi ndee naxa bonbo, e mayele soto, e lu geeli kui, e xirixi yolonxoniyi ra. <sup>37</sup> Mixi ndee

naxa magoro, e naxa tooo, e naxa a ibolon, e naxa faha santidegema ra. Ndee naxa lintan, yexee nun si kiri ragoroxi e ma, se birin baxi e yi ra, e paxankataxi, e halakixi, <sup>38</sup> e nu fa lintan gbengberenyi ma, geyae longori ra, fonmee nun yilie kui. A mu nu lanma duniya mixie xa na binye soto na danxaniyatooe xa lu e ya ma. <sup>39</sup> Na mixi naxan birin xili fanyi soto e xa danxaniya saabui ra, e mu fee soto naxee nu laayidixi e be. <sup>40</sup> Ala mu tin e xa fe xa kamali won xanbi. A bara fe fanyi janige won be naxan dangi fe singe ra.

## 12

### *Tunnabexi*

<sup>1</sup> Na danxaniyatooe gali, naxee bara e xa danxaniya masen duniya be, e man xa findi misaali ra won be. Won xa fe birin nun yunubi birin nabolo naxan won toooma won ma jere kui. Won xa won gi tunnabexi ra kira xon ma Ala naxan saxi won ya ra. <sup>2</sup> Won xa won ya ti Isa ra, naxan danxaniya kira rabixi won be, naxan fama won ma danxaniya rakamalide. Isa tin ne wuri magalanbuxi xa tooe ra, alako a xa seewa yare. A mu gaaxu na yaagi ra. Na kui, a xa faxe dangi xanbi, a naxa a magoro Ala xa kibanyi yirefanyi ma.

<sup>3</sup> Wo xa ratu a xa misaali ma, a toooxi ki naxe yunubitooe saabui ra, alako wo naxa tagan, limaniya naxa ba wo yi ra. <sup>4</sup> Wo mu yunubi gerexi sinden, han wo wuli xa mini. <sup>5</sup> Wo tan, Ala xa die, wo bara neemmu Ala xa masenyi ma wo ralimaniyaxi naxan na, a falafe ra, «N ma di, i naxa yo Marigi xa marakorosi ma,

limaniya naxa ba i yi ra, a i xuruma temui naxe.

<sup>6</sup> Marigi a xanuntenyi nan xuruma.

A naxee birin kolonxi a xa die ra, a e naxankata.»

<sup>7</sup> Wo xa tin na ra, barima Ala na wo xurufe ne alo a xa die. Di mundun na, naxan baba mu a xuruma?

<sup>8</sup> Xa Ala mu wo xuruma, alo di birin xuruma ki naxe, a luxi ne alo wo mu findixi a xa die ra, a lima a halale mu wo ra. <sup>9</sup> Won babae won xuruma dunija, won fan e binya.

A mu lanma won xa tin a ra, Baba Ala naxan na ariyanna, a xa won xuru alako won xa kisi?

<sup>10</sup> Won babae nu won xuruma waxati di nan bun ma e yete xaxili ra, konɔ Ala tan won xuruma won ma munafanyi yati nan ma fe ra, alako won xa lu Ala xa seniyenyi kui. <sup>11</sup> Na xurui xɔɔɔɔ, a mu mixi raseewama a fole, konɔ a donxɔe ra, a foxi tinxinxi raminima ne yare bojesa kui.

<sup>12</sup> Na na a ra, wo xa wo senbe so, wo tan naxee belexee taganxi, naxee xinbi toɔɔɔxi. <sup>13</sup> Wo xa wo jere kira tinxinxi xon ma, alako mabenyeie naxa telexun, e xa yalan.

<sup>14</sup> Lanyi xa lu wo nun mixie tagi. Wo xa lu seniyenyi kui, xa na mu a ra wo mu Marigi toma. <sup>15</sup> Wo xa meeni wo bore ma, alako mixi yo naxa mini Ala xa hinne kui. Wo naxa lu xonɔ ra wo bore ma, na fa mixi gbegbe toɔɔɔ wo ya ma.

<sup>16</sup> Wo meeni de! Wo naxa yene raba. Wo naxa seriye kana alo Esayu, naxan a xa forija tide masaraxi bande lenge keren xa fe ra.

<sup>17</sup> Wo a kolon a to nu waxi a baba xa duba a be, a xa forija ke soto, a baba naxa tondi. Esayu naxa a mayandi yaye ra, konɔ a baba mu tin na ra.

<sup>18</sup> Wo mu wo makore na yire ra wo xa wo belexe din a ra alo Isirayilakae fe naxan to

gbengberenyi ma. Tε nun nuxui fɔɔrε nu na geya fari dennaxe, foye xungbe nu bɔnbɔ a ra. <sup>19</sup> Wo mu sara xui nun Ala xui magaaxui mexi. Isirayilakae to na mε, e naxa Munsa mayandi alako e naxa na xui mε sɔnɔn. <sup>20</sup> E naxa gaaxu Ala xa yaamari ya ra, «Mixi nun sube yo din yi geya ra, na kanyi fama nε magɔnode, a faxes.» <sup>21</sup> Na fe nu magaaxu han Annabi Munsa naxa a fala, «N bara gaaxu han n bara serεn.»

<sup>22</sup> Kɔnɔ wo tan bara wo maso Siyoni geya yire ra, Ala Nijε xa taa naxan na ariyanna, Darisalamu naxan na koore ma, malekε wulu wulu malanxi dennaxe sεεwe kui. <sup>23</sup> Ala xa pama fan na na, naxee xili sεbexi buki kui ariyanna. E findixi Ala xa di singee nan na. Dunija Makiitima Ala na menni nε, a nun tinxintɔε nii naxee xa fe bara kamali. <sup>24</sup> Isa fan na naa, naxan bara findi saabui ra saate nεene rakamalife ra, naxan wuli bara findi serεxe ra. Na fan dangi Habila gbe serεxe ra.

<sup>25</sup> Wo naxa tondi Ala xa masenyi ra. Mixi naxee tixi dunija bende fupɔ fari, e to tondi na masenyi ra, e naxa paxankate sɔtɔ. Yakɔsi, won munse sɔtɔma sɔnɔn xa a sa li won tondima masenyi ra, naxan fatanxi Ala yati yati ra naxan na koore ma? <sup>26</sup> Singe Ala xui naxa bɔxi raserεn, kɔnɔ yakɔsi a bara laayidi tongo, «N man bɔxi raserεnma nε, kɔnɔ yi biyaasi n koore fan naserεnma nε.» <sup>27</sup> A to a fala, «n man,» na nu wama a masenfe nε a se daaxi birin naserεnma nε, a fa kana. Fe naxan mu raserεnma, na nan luma, a mu kana. <sup>28</sup> Won fama lude mangeya niini naxan bun ma, na tan mu serεnma, na mu

kanama. Na kui, won xa Ala tantu, won xa a batu yaragaaxui nun binye ra a wama naxan xɔn, <sup>29</sup> barima won Marigi Ala luxi ne alo te naxan se birin ganma.

## 13

### *Marasi danxaniyatɔee be*

<sup>1</sup> Wo xa wo tunnaɓɛxi wo bore maxanufe ra ngaxakerenya kui. <sup>2</sup> Wo xa xɔɓe rasene a fanyi ra. Mixi ndee xɔɓe yigiyama ne, a fa sa li e mu a kolon xa maleke na a ra. <sup>3</sup> Wo xa ratu geelimanie ma nun mixie ma naxee paxankataxi. Wo xa fe fanyi raba e be alo wo birin na fate bende keren nan kui.

<sup>4</sup> Wo birin xa futi binya. Yene nun langoɓa naxa lu wo ya ma, barima Ala fama ne na seniyantarepa makiitide. <sup>5</sup> Wo naxa a lu kobiri xa fe mile xa wo rapere. Naxan na wo yi, wo xa wo wasa so ne. Ala yati naxa a masen, «N mu i rabeɓinma, n mu i raboloma.» <sup>6</sup> Na nan a toxi won noma a falade limaniya ra, «N Marigi n demenma, n mu gaaxuma. Adama tan noma munse rabade n na kore?» <sup>7</sup> Wo xa ratu wo xa yareratie ma, naxee bara Ala xa masenyi masen wo be. Wo xa e jere ki mato, e xa danxaniya xa findi misaali ra wo be.

<sup>8</sup> Ala xa Mixi Sugandixi Isa mu masarama. A nu na ki naxe xoro, a man na na ki ne to, a man luma na ki ne abadan, na birin keɓa keren. <sup>9</sup> Wo naxa bira xaranyi mooli gbetee foxo ra. Wo boɓe xa senbe so Ala xa hinne saabui ra. Yaamarie, donse raharamuxie xa fe ra, nee mu noma wo malide. <sup>10</sup> Horomolingira

walikɛɛ mu nɔma sɛrɛxɛ donde naxan baxi won tan bɛ. <sup>11</sup> Sɛrɛxɛdubɛ kuntigi xuruse wuli bama nɛ sɛrɛxɛ ra hɔrɔmɔlingira kui yunubie xa fe ra, kɔnɔ na xuruse fate tan ganma nɛ taa fari ma. <sup>12</sup> Na nan a toxi, Isa fan to wa jama rasɛniyenfe a yetɛ wuli saabui ra, a naxa jaxankata taa fari ma. <sup>13</sup> Won fan xa bira a fɔxɔ ra na yaagi kui taa fari ma, <sup>14</sup> barima won na taa naxan kui, a mu buma. Won taa nan fenfe naxan fama fade.

<sup>15</sup> Won xa tantui fi Ala ma sɛrɛxɛ ra tɛmɔi birin Isa saabui ra. Na sɛrɛxɛ findima won ma masɛnyi nan na naxan a xili matɔxɔma. <sup>16</sup> Wo man naxa nɛɛmu fe fanyie rabade mixie bɛ. Wo xa wo booree ki, barima na fe mɔɔlie findima sɛrɛxɛɛ nan na naxɛɛ rafanxi Ala ma. <sup>17</sup> Wo xa wo xa yarɛratie xui ratinmɛ, wo xa e xa yaamarie suxu, barima e na mɛɛnife wo ma, alako wo naxa gbilen Ala fɔxɔ ra, xa na mu a ra na dɛntɛgɛ sa fama nɛ e tɔɔrɔde. Wo xa fe birin naba alako e xa nɔ na dɛntɛgɛ sade sɛɛwɛ kui bɔjɛ mawa xanbi, barima na nan findima wo xa munafanyi ra.

<sup>18</sup> Wo xa Ala maxandi muxu bɛ, barima muxu a kolon muxu xaxili fiixɛ, muxu wama jɛrɛfɛ fe fanyi mɔɔli birin nan kui. <sup>19</sup> Wo man xa Ala maxandi muxu bɛ, alako n xa nɔ gbilende wo yire mafuren mafuren.

<sup>20</sup> Ala naxan bɔjɛsa fima mixi ma, Ala naxan won Marigi Isa rakeli faxɛ ma, Isa naxan mɛɛnima a xa mixie ma a xa saate wuli saabui ra, saate naxan mu kanama abadan, <sup>21</sup> Ala xa fɛɛrɛ birin fi wo ma alako wo xa nɔ a sago rabade. Ala xa fe lu won bɔjɛ ma naxan nafan a ma a

xa Mixi Sugandixi Isa saabui ra. Matoxoxe na a be abadan. Amina.

<sup>22</sup> N ngaxakerenyie, wo xa wo haake to n be yi masenyi xa fe ra, barima n mu woyenyi xonkuyaxi a gbe ra. <sup>23</sup> Wo xa a kolon won ngaxakerenyi Timote bara a yete soto. Xa a mu bu fade, muxu birin fama ne wo yire. <sup>24</sup> Wo xa wo xa yareratie nun seniyentoxe birin xeebu muxu be. Italikae naxee na be, e fan bara wo xeebu. <sup>25</sup> Ala xa hinne wo birin na.



**Soso Kitaabuie: Tawureta, Yabura, Inyila**  
**The Holy Bible in the Susu language of Guinea (Soso**  
**Kitaabuie: Tawureta, Yabura, Inyila Bible)**

copyright © 2015 Mission Évangélique Réformée Néerlandaise et les  
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative  
Commons Attribution-Noncommercial-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2020-11-11

---

PDF generated using Haiola and XeLaTeX on 11 Nov 2022 from source  
files dated 29 Jan 2022

f1d08866-ea3e-5b9b-b506-e7690c5c61d2